

四庫全書

集部

欽定四庫全書

集部

景迂生集卷三

詳校官庶吉士

臣初喬齡

侍讀臣孫球覆勘

總校官編修

臣王燕緒

校對官中書

臣王慶長

謄錄監生

臣姚階琴

欽定四庫全書

景迂生集卷三

宋晁以道撰

奏議

負薪對

負薪有廊廟之憂固善矣其如廊廟之耻何曰廊廟顧
豈無憂哉特與負薪異耳且天下之患莫大於同樂而
異憂作負薪對

今上即位元年正月初金人以我疆場之臣無狀斥候不明遂據我河北入我河東直抵京師城下金人非漢老上單于之比也其兵亦無老上單于十四萬之衆也彼時烽火照甘泉宮望長安猶踰百里而遠今何為使我直有城下之師犯孔子春秋之大禁夫其或者警懼漢文帝者猶淺與負薪憂其九失而有三策皇帝陛下初下親征之詔遠邇聞之靡不思奮咸曰是我太祖皇帝之舊章也今皇上真似之也太祖皇帝受天眷命即

位之四月昭義軍節度使李筠叛習五代之餘釁自恃其兵馬之勇可稱其山河之壯太祖親征倍道兼行其勞至於聖躬負石馬上使太行不得以為險即日城破筠投火以死蓋是舉也樞臣廷祚為太祖獻策曰宜出師擊之西京向拱曰陛下宜速濟大河歷太行稍緩之則使賊熾矣控鶴左廂都校馬全義亦於澤州城下進言曰緩之適足以資其奸便全義中矢拔去被血以先士卒筠不得不與火俱滅之速也是歲九月揚州李重

進自謂周室之勲舊繼以叛聞太祖親征復如李筠與
火灰燼筠則北結劉旻重進亦南通李景其禍心不淺
而不及掩耳於迅雷則奈何嗟夫金人之勢逼於前日
而鑾輿之出異於他日者陛下無謀臣如廷祚如拱而
將無如全義者乎如其有能成陛下之初志者天地為
之威怒風雷為之震擊跛者起而喑者呼寧論女子童
稚奮袂之勇哉或曰如陛下即位之初何曰陛下即位
之初孰如太祖當宋之為宋方四月之初哉或曰論兵

則我寡彼衆曰戰之勝負不在兵之衆寡而在將之能
否自古以來不可勝言也莫若以今事著明之太祖在
周時以百騎却遼衆將高模翰之兵數萬於瓦橋關之
北開寶初太祖命曰欽祚以兵三千於定州背城以破
遼六萬于時軍中有三千打六萬之謠至今塞上兒童
猶以此語為戲不忘也借曰兵寡豈無三千背京師城
而陣當見人人如田將軍也關北百騎則待陛下之臨
戎復如真宗皇帝改元之二年乘六龍幸大名遼人望

天戈不及戰而大敗遯去越五年御龍轡幸澶淵遼人纔至望天戈不及戰自敗而請和是我不速於和而既利則能久者也于時上相畢士安開其謀次相寇準堅其行殿前高瓊効控馬渡河之力皆賴上意先定於前年之征也太祖再出征真宗亦再出征若其問罪河東則太祖太宗皆一出征陛下不一出征乎其失之一也圖功以威克愛者政典也政典者軍政之典也治國之常道則威與愛均也方有事時漢景不能誅晁錯則天子之

威令不申而晉室割據之亂象已肇也唐肅宗之威令
不申而有郭子儀李光弼為將不能平幽薊武宗之威
令申以石雄張仲武為將而足以討澤潞近者周世宗
即位之三月親征劉旻及契丹于上黨其愛將樊愛能
何徽敗績世宗立取而斬之將校股慄思用命而劉旻
在太原亦為之破胆失據世宗之師由是出無不勝而
四方僭叛相顧失色中國之威一日而振實為我有
宋之驅除也國家不幸有敗國微亂之賊為萬世之羞

非戰將一日失律之比者曰京曰貫曰黼曰攸曰

闕

方金人在城下時宜梟以視之又醢以賜之因有詔勅
曰此醢非他物也為人臣而不忠者不度事之利害不
慮國之安危天命予一人戮之凡食者誠焉無怠彼金
人雖甚怒我而大將亦甚服我賞罰之明顧弗之懼哉
舍此而不為其失之二也兵出無名事故不成明其為
賊適乃可服古兵法之言也唐高宗時薛仁貴為蘇定
方討賀魯而言之遂克成功今國家於金人曾不遣一

介之使問其所以來者何名也彼素通好契丹乃一日滅契丹之國自建隆以來通好我有宋復一日舉烏合之衆頓于堅城之下果何名哉夫我固其與國也玉帛初陳車傳未息相與之新當如是乎無乃疆場相侵乎請責之疆場之臣否則將帥失信乎請責之將帥之臣今日果何名也耶執事者既不責金人之無名又不思所以折之者重可惜也何則自古兵之大禁垂車深入則敗猖狂不制則亡貪人金幣則滅有所恃而驕則

衆相殘淹時而兵老則下必圖其主帥金人俱犯此五者我出而攻焉可也執事者似未之明也苟不明也此則敗亡反在中國矣可不念乎金國之君不知何人恐非漢高之英雄唐太宗之材武可與為比也其謀臣郭藥師者惟能與我閹貫為謀而嗜利尤甚如中行說輩借以資其身取富貴耳恐亦不可比祿東贊之辭婚可以動唐太宗尚結贊之狂謀幾能擒渾瑊如藥師者使得一粗曉邊情部隊將說之不過一二言而折服之矣刑餘

而又責之貫實在部隊將之下者也。大抵不知其兵則視其將，不知其衆則視其國，不知貧富則視其器械，不知其所為則視其所好。金人之將如郭藥師，則其兵可知也。其國之東西幾何，南北又幾何，先附高麗，後附契丹，介于奚、靺鞨之間，實東北諸國之尤小者。今亟興師乘馬而南，則其衆可知也。器械必資銅鐵、竹箭、膠漆之上品，舉非彼之所產，宜其窳頓不剛。惟我國之器是取，則其貧富可知也。金人之嗜好出則攻城畧地。

入則蒐乘補卒則其所為可知也凡百混一天下之模
未嘗脩也昔侯景所與同惡無非鴛才其黨自嘆曰乖
僻至是安得不敗金人似景未必有持久之術也苟明
乎此則何憚而不與之戰焉既此之不明其失之三也
金人欲結和須割地以河為界執事者不盡河以與之
姑與高陽府中山府太原府計其郡縣無慮名城將百
數自以為有謀也不知今天下者太祖之天下也孰敢
謂寸土不在王會圖哉高陽中山者我太祖太宗暨周

世宗躬冒矢石艱難而得之者乃一日談笑而弃之耶
太原則太祖太宗相繼親征冒矢石甚於河北其艱難
則久于河北真宗自謂先帝竭四海之力以得太原顧
弗重耶又忍如墮甑而弃之耶執事何不往告之曰彼
初稱女真時在我太祖朝嘗取我白沙塞三馬適爾通
好之使在闕下太祖命留之無還次年渤海之使為女
真重申舊好則送之其在太宗時女真困於契丹之三
柵遣使借兵亦相好甚矣不意欲盡取中國之地如今

日也此其失之四也金人且無已日遣使徵黃金重幣不知其幾何但聞國家府庫空竭下据於公卿大夫士家細不遺乎閭里民庶其上逮宮幃供奉之器則志在卹鄰者當矜之也方唐吐蕃縱橫較轢時入京城劫掠黃金則固有之亦不聞明言求金於王城也其在鹽州夏州者則嘗求金矣是以吐蕃施於鹽州夏州者金賊傲侮於京城也不已甚乎執事者何不諭之曰府庫者祖宗之府庫也國家於經費之外未嘗敢以一毫賞無功

也且國家初未嘗相聚歛之臣亦無事于庫府之富也
安得有金以滿谿壑之欲哉在我國家之初女真歲以
市馬於中國而資富其後女真結好契丹則中國但知
有契丹之馬而不知有女真之馬也女真之名馬遂亦
絕種得非天以其馬畀中國而不畀契丹乎女真又安
得而私耶以故興師而南惟以無馬為恨出令徵索而
未知已也豈彼既不得吾市馬之金乃為此過求耶人
情皆貪而多詐若彼國之進取無已高麗尤畏之雍熙

閭嘗為吾使者訴之也以黃金弃之溪壑此其失之五也春秋重信盟生于不信春秋是以誅盟中國諸侯之盟固所在誅況以中國盟夷狄乎又況以王人與盟乎隱二年唐之盟魯與戎人盟也此春秋始隱之一端也僖八年洮之盟二十九年翟泉之盟王人與盟也此春秋責齊晉之重者也兵而不已至於盟盟而不已至於質子則又春秋之所不誅也在漢唐時但聞外國有質子于中國不聞中國有質子于外國禮則然也金人一

日子王城下盟誓而質子苟有明春秋之大臣則其責當如何無乃失我國之所以尊者乎彼如有求質子而及親王也何不諭之曰親王者上皇之子也陛下方如堯親九族忍弃上皇之子於外國乎如質陛下之子則方就外傳未任行伍之事也彼雖怒我未必不念我父子兄弟之親也聞此言恐亦惻然哀之矣又如求質宰相則當諭之曰宰相者陛下之股肱也何可一日不相與以成一體乎邦昌者雖不知為何等人既命之為宰相

則當待之以宰相也彼方重視君臣則必知宰相之重矣亦聞此言而得安乎雖然質固何有哉曹公因韓浩拒呂布不顧夏侯惇之被質著令有持質者皆并擊弗顧由是劫質者遂絕此曹公所以能振威於中國也今我國不得其所以為尊者其失之六也然金人一日得吾瀛定并門重鎮未必能為其強其得吾金幣無慮數十萬未必能為其富何則其俗喜相吞併鬪爭是其勁悍英武流弊所必至也極其強則必爭古今國家名號大

小見於史冊者百十今其存者無一二皆以其財富而自底滅亡者也今雖強敵禍變生於不測未可知也惟有一事大可懼者又特遺之以謀臣也遂將使此敵國得以其強者為強富者為富可不懼乎國家以契丹歸朝官悉遣歸于此敵國無乃執事者未之思乎蓋此色人布滿州郡無慮萬數遠者十數年近者三四年且嘗預官聯臨局務亦有喜讀書通吏事者其便弓馬多膂力喜戰鬪則又其性習然也且於中國之事體人物靡

有不知其孰強孰弱孰能孰否與夫道里孰遠孰近孰險孰易皆得以為彼國之謀其害一也此色人在中州初頗喜自陳其高曾之家世曰此大家者吾之同祖也曰此郡縣者吾墳墓猶存也幸今復為王民亦頗買田種藝與人家婚姻其意不淺矣亦頗有惜中國不用賢多遺才為司馬公而歎息者今一旦阻其慕王風之心投之於燕南薊北之境則以其苦心為之謀生其害二也且彼與金人亦有平日怨嫌不相能者或當南北戰

鬪時兵刃相殘之酷者今又一旦快彼雄心其害三也
彼攜老幼慟哭駕戎車彎弓露刃而行籍籍道路間言
曰投彼死爾孰若死在此以故所過之處閉戶避之既
宿而去則居者相賀如其為彼用也亦可慮哉其害四
也金人分布於城下時此輩亦有請質妻孥願與之格
鬪者廟堂之謀曾不知出此而州縣固不敢上聞矣此
一大便而資以為彼強敵之用其害五也彼歸自契丹
而乃復歸之於金人不知為何名也無乃示怯於金人

者過甚乎其害六也使彼顧盼之間褫我國之衣冠復幽并之舊俗弱者羞惡强者怨恨道路為之咨嗟非王者者無外之度非天下無不覆之美其害七也明有此七害而議者不過曰廟堂有徙戎之論為日久矣適此時而徙之不貽中國他日之害也復請之曰如可徙也豈無異日執事者幸少待之徙之金人孰若待我國家廟堂之議成復疆理幽薊之舊土使彼復有仕於彼乎且諸葛亮於南蠻四郡皆因其土人而仕之矣借此萬餘

人皆無所知解直以增彼馳突之數固亦不可彼敵國
實難得生齒所以汲汲是求也昔朱克融輩方饑寒於
京師時從宰相乞一飽之日而不可得安知復有幽燕
故巢不忝其祖滔之風終為唐室之害哉乃不用宣和
七年以前詔書復存之於中國其失之七也此賊蟻聚
於城下時大臣不知畫謀不知一日縱敵百世為害戰
士不肯盡力蓄禍以累君父圉人養虎自貽害不勝責
也傳曰無仗節死難之臣孔子傷焉可不信乎設不能

有鐘鼓舉而伐之尚可震而逼之合而圍之使人不得渡馬不得食敵師不忿而轉鬪以去則相率而四散矣奈何既不能攻又不得圍縱其遊騎散卒或百或十朝出而殘一邑又明日出而殘一邑王畿根本之地富室最多適足以資其流血成溝也王畿蕩滅將盡遂及輔郡諸縣鎮走官吏如雞犬取故相家孫女姊妹縛馬上而去執侍幕中遠邇膽落不暇寒心然非金人殘之也實官軍殘之也方敵入一邑時未聞官軍一人襲而來

救咸謂彼出不意而我適不為之備也以故如閻貫前
日臧底河之敗士卒死者十萬不減永洛之酷朝廷莫
得而聞也貫感熙河經畧使劉法出師為西賊掩而殺
之如攜童稚朝廷受百官班賀西賊之捷也近而劉延
慶於雄州北疆尸百餘里而奔金帛軍實於積尸之中
不可稱數并取雄州弓手天下稱為梟勇而契丹素所
畏者貫悉殺之朝廷既不正典刑於延慶而貫尋封王
矣法制之兵當如是乎其失之八也或曰國家征兵於

方鎮而未至也前與之和矣曰城下之盟有以國敗不能從也是春秋之法也敢不守而行之韓信之伐齊先有酈食其與齊和矣李靖之滅頡利唐儉深入虜庭而和矣薛仁貴之取九姓先受其降而知降者偽則不若悉坑之之威也是皆春秋之法也何獨古人以制勝今則失之無乃天下之士惡言孔子春秋之弊乎雖然征兵於方鎮而不急奔命者其故何也漢陳豨反於代高祖以羽檄徵天下兵未有至者高祖乃躬選壯士於邯

鄆蓋締之罪未白于天下也唐代宗有吐蕃党項圍京師之危詔諸道兵四十日無一人入關者吐蕃党項雖為天下所嫉而程元振李輔國凶閹之不君復為天下之所忌也天下豈不曰元振輔國者吾家之吐蕃党項也塞上之吐蕃党項吾力可及而吾家之吐蕃党項吾力之不可及也今閹貫之凶醜出元振輔國上既未梟而醢之尤為天下之所忌也然實因兵制驅之而然者何則兵在州郡則兵馴而州郡重兵專命將則兵驕而州

郡輕蓋將重則州郡不得不輕將驕則兵不得不驕惟
州郡輕則帥府輕帥府輕則京師輕此天下之勢也祖
宗之兵寓於州郡命其守臣曰知州軍以某軍重某州
也其將則州都監是也州郡都監平日事其守臣卑且
謹則其兵無自肆也此祖宗之兵制也開寶之兵三十
七萬是謂必勝之兵至道之兵六十六萬是謂威武之
兵天禧之兵九十一萬是謂太平之世保大之兵慶厯
之兵一百二十五萬是謂昊賊之後應變之兵皆以根

祇京師而支幹四方宜其百世莫得而加損於一日也
乃有大臣喜變更祖宗之法度兵制亦不得而存合數
州之兵以為一將將重而州郡輕矣州雖有兵之營幕
而窘於月食時衣其號令之所加進退之所繫則在將
而不在守臣以都監而領剩員廂軍之外不知將司一
事也將兵視州民如胡越將官待守臣如寇讐又有大
可懼者幸宗廟社稷之靈無回戈吞噬之變則昧者未
之諭也惟司馬溫公熙寧中在洛下見留守前宰相韓

絳以數十老弱之卒奉旨禱雨中嶽而將兵有出城之
禁奏疏論之曾布帥太原躬自不勝將司之無禮而終
不以將法為非也今者不幸有金人之役如徵舊制之
兵則詔至一日之日則一州之兵奔命而東上不必待
於他州切恐他州之我先也州兵之急於用也今徵新
法之將兵而將兵分隸數州必合而起之又各仰其州
之錢糧以資之是州兵一日之事為將兵累日之事也
將兵之不可急用也如此國家承平日久人材不甚相

遠都監之材武不知視將官果如何惟閭人之役商旅之族乃得超授將官而都監孤寒以考第平進者不敢與之比也此州郡兵制之失使其赴援不時之弊也若其京師兵制之失使其寡弱不足以為京師之重而威乎天下者亦其自變更祖宗之舊制也祖宗知漢唐都雍與洛以山河為險人可兼而有也今都汴陽無山河為險而惟以人為固乃屯重兵於京城之下或分糧於京畿之邑他人莫得而輕重之惟我以之為用是本朝

以兵設險險於雍洛之河山也奈何喜變更之大臣銷去祖宗傳城之兵營曰坐糜太倉無用也曰闕額之金因得以為利也閒地可以建室廬也大臣而淺且陋一至於此安知百世之安危哉宋守約自以併營為功聞於一時矣使我翊衛京城之兵營十無一存者矣今之貴臣強宗則為別館園囿與夫道宮釋宇者皆昔之營地也後生但誇今日遊地之雄孰知昔日宿兵之雄哉倘如祖宗之舊制城外之兵營綦布相望而警歟之音

日夜徹乎數百里之間使四夷來朝貢者遠而望之於
鬱葱佳氣之外有森然不敢仰首之威光則彼金人雖
欲肆威於城下而無以留旦暮也祖宗以兵為險而城
不必高池不必深也吾之京師是謂天邑是謂神皋其
守惟在四夷也由是觀之祖宗京師之兵制優於唐之
時府衛多矣唐之府衛遠而不若我之近也唐之府衛
勤於命將而我初不命將以私之也內外兵制繫國家
安危今皆失之九也幸而有三策焉曰命威望之大臣以

守魏而高陽可保也命威望之近臣以守鎮而中山可保也在唐則魏博重於真冀真冀重於幽燕魏博真冀合而制之燕者也祖宗於河北建四郡而河東惟太原一鎮其旨微矣今不得已於晉於潞或特建一鎮或各建一鎮則太原可保也此重鎮之策也於河北河東能慎擇守臣文武並用待之則厚委之則專於轉運使提點刑獄之外無繁碎旁午之使者以蹂踐之搏噬之則金人雖得吾州縣而無得乎人者安能一日而居哉大

要如太祖時郭進於邢州李漢超於關南何繼筠於真
定賀惟忠於易州李謙溥於隰州姚內斌於慶州董遵
誨於通遠王昇於原州不減唐李抱真於澤潞馬燧於
太原日崎嶇於兵馬之中而威震於華戎之上吾民既
安矣何恤乎敵國夫然後於民給復者五年之末猶三
年明詔曰小澤之利與爾共之吾不禁也鹽食之貨爾
專有之吾不與也爾無種糧則吾給之爾無牛耕則吾
畀之爾無農器則吾鑄之於是乎十數年流轉四方之

民不約而無遠邇來歸矣唐宣宗何德以復累世所亡河湟之地哉而能以恩惠顧於既歸之後猶不失春秋重民之道也比內治之策也遠交而近攻者范雎之謀唐太宗為能用之也王者之師不必出而以外國攻外國則王者之師不戰也國家之制遼賊命於藩羅支其制元昊亦命乎唃廝羅是世効忠順以振朝廷者一旦滅之為郡縣今熙河是也自是外國怨中國多矣德之不以為恩也疆場之上無日無烽火之警今因金人來

伐之後不然大變其政得重使如唐賈林本朝曹利用
之類以告室常奚霄韃達諸蕃鳴金人之過而四攻之
金人何地以稱強哉若高麗則金人素所臣事者我之
厚高麗者如何其為我緩急之役當如何將見金國雖
欲固不可得也春秋之功莫大乎存亡國孔子猶書衛
人立晉不與齊侯之專封而大天子之命也今天子為
能命人訪昔耶律之後禮而立之則九夷八蠻罔不仰
中國之至仁服庇下之丕德非特為耶律氏再生骨肉

之恩也仁之所施者深則誠之所歸者廣於是乎耶律氏為我藩籬捍禦金人而力折之凡厥涿薊諸郡恐却之而必以歸也漢光武不肯從臧宮馬武之謀因匈奴衰亂而取之乃立南單于以制北單于唐太宗雖曰滅頡利而立突利可汗使率其故部示不滅人之國也故曰兵所以存亡繼絕救亂除害也今何憚而不為此外交之策也唐太宗有郭子儀為將吐蕃內侵相繼五年德宗有李晟為將而吐蕃內侵相繼三年則今日之憂

未易以一冬一春畢也廟堂之上可遽緩帶乎借如三鎮之地已無及而三鎮之餘猶可及也今日之師已無補而明年之師或尚可補也皮膚之疾愈而却醫可也心腹之疾猶存而醫未易却也

達言

君子終老而困窮不得于事業猶見於言言者君子之事業也天下無道君子既不得位又不得言天下有道君子雖不得位猶得於言言者有道之世也作達言

唐虞之世豈有蠻夷猾夏之事乃以蠻夷猾夏命皋陶作士何也曰是事之有無典策亡矣孰詰也蓋有猾夏之蠻夷不害為唐虞之至治而或命官于無事之時以為天下萬世之戒是所以稱唐虞之聖者也雖然又言寇賊奸宄何也曰天下治亂必原其所自彼蠻夷猾夏實自乎寇賊奸宄也以故古昔天下禍亂之機與夫存亡之微折猶與而果決存百世於一朝者皆自吾內以餉乎外也項羽之勇范增之智不能執沛公于座上者

項伯舞劍以身衛沛公也曹公袁紹相厄官渡無異兩
虎額吼果誰勇怯而曹公卒走紹坑其衆八萬者紹將
高覽張郃輩率衆來降而曹公知紹虛實得以奮擊也
符堅以百勝之威百倍東晉之衆有姚萇慕容垂為將
視晉君若浮苴孤驚然乃絕淝水未半而潰于謝石五
千之兵秦帝僅以身免者萇垂懷亡國之禍心其尚書
朱序降晉而為之謀曰大兵未集而擊之易也魏叛臣
侯景狐兎犬狼之衆何足以當梁氏汪海富庶太平之

久乃一旦入石頭據金陵如戲劇者梁臨賀王正德尊
景反而丞相朱异先與景交通也唐代宗朝雖有郭子
儀在朝而吐蕃回紇頻年入長安踐京畿者李輔國程
元振二閹無君子內而僕固懷恩於外為蕃寇之盟主
也昭宗時李克用朱全忠相噬不減袁曹而唐室之危
甚于官渡未知二孽誰先得之一旦全忠先滅唐為梁
也唐宰相崔縉即陰為梁之佐命也嗚呼蠻夷寇賊奸
宄實同機並杼而發也今河東河北之人十餘年來不

辨蕃漢之兵皆曰童家之兵也不辨蕃漢之旌旗甲馬
皆曰童家之旌旗甲馬也至於金穀貨幣不知為朝廷
之有皆曰童家之金穀貨幣也故金人一日大軍入河
北分軍入河東遠而石嶺關不得以為固近而大河不
得以為險談笑以抵京師城下者官吏之疲弱人民之
愚蠢以金人之兵甲旌旗久無辨於彼此也幾何而不
開門洒道以迎之也哉金人於京師城下有德色大言
曰童王招我來聞者恨之閭方平既以大河之橋延金

人又欲以京師城門納金人益可懼乎京師百姓于是
上念社稷宗廟之危下顧父母子孫之酷不勝其忿不
約而起大呼於道取閹孺數十人于馬上拉而碎之則
人情大可見矣夫其或者必以閹貫待司寇藁街之誅
未使戕於市人之手與執事者其可忽乎或者不敢沒
輿論而私懷羣閹之惠則假之于市人指詬宰相以高
歡憤張彞為言何其不知類也東魏征西將軍張彞子
仲瑀乞鐫削武人品秩羽林千餘人乃殺彞父子甚慘

于是德朔鎮使高歡在洛見之歸而傾產結客得司馬
子如孫騰侯景輩逞其樂禍之心豈今日比也魏羽林
千人實雜以羌渾之醜報其一身之事爾今京師巨萬
齊民世世荷皇家亭毒鞠育之恩相與念禍起無端一
日蟻結於嚴城之下天子將不得一日之尊京師將不
得一日之大深究禍亂之原實在羣閹則取殘之以我
之公憤論彼之私讐相去萬里而遠也彼高歡異類久
以胡后臨朝淫亂元人劉勝輩寵任驕恣流毒國中魏

室將亡歡先有心則因彛事而作耳國家累聖洽光四海澄清陛下尊養青宮者十年其傳祚之數日皇天以此強敵警懼增德豈齊魏之妖可並世而言耶乃若宰相為都人指詬毀辱者昔亦有之唐憲宗明君也相皇甫鏞之日殿廷班列相與驚駭街衢市肆相與大呼裴度率衆情而上疏曰忽取微人列於重地遠近流聞與京師無異度之言可信不誣也未聞當時責驚駭者何士刑笑呼者何民豈不謂此邦家之羞也惟當自治于

上而一切無怒於下耶或者不以皇甫鐸為言而言高
歡以垢聖世何也孰知天地之陰陽消息見於君子小
人之進退君子小人迭為進退而各從其類不可須臾
並列也其為宮嬪為財賂為閹官為兵革為盜賊為邊
警皆陰也從小人而類進者也若夫朝廷有道絕女謁
薄官爵不私財賂不翫兵革盜賊不起四方賓服者皆
陽也君子以類進者也惟小人盛於廷則兵革起於外
在廷無一小人則在外無一強國鎡銖低昂不欺也小

人方盛而盜軒冕則外國亦盛而臨疆場小人熾盛而僭公卿則兵戎亦大盛而害王侯一日小人退而天下寧不勞干戈鼓鼙之武也若小人與君子雜進則介冑與冠裳亦並用小人未盡退而天下未盡寧也今日之事可觀也已

重地

有國家者重地而不得已於征伐作重地

春秋重地何也曰王者得民而安斯民得地而安有人

焉雖微矣以地而重也邾庶其莒牟夷邾黑肱皆賤不當書者邾庶其以漆閭丘之地而重也莒牟夷以防茲之地而重也邾黑肱以濫之地而重也下國小邑之微人以地叛而何能為重所以重其誅也苟不以地叛則一身之罪一時之禍也其以地叛則不特一身之罪貽百世之禍也春秋之重地者所以愛民也正天下國家之本也邾莒之君孰與天下之君大漆閭丘之地孰與中國形勢之地重屬者金人銳師直薄京師城下執政

大臣遽以高陽中山太原三鎮與之竊恐非春秋之旨也兩國交兵如火不戢者焚而其戢者亦焚火不焚則不已也兵之為禍甚大如此而不得不用者豈不為疆場之野尺寸之地哉疆場之野尺寸之地殺人流血非王者之本心干天地之和氣而必爭之乃以中國數千里形勢之重鎮未嘗接戰而棄之乎言之及此孰不寒心論失中國之形勢則禍福之幾有不可勝言者我國以力控制彼國者也乃委此地於彼國使以控制我

國乎契丹因石晉而分據一飛狐嶺之陰議者每不勝其憤為之切齒扼腕今乃以十百飛狐嶺使彼據之乎其禍不特有吐蕃回紇之侵唐將有劉聰石勒之繼晉乎請以三國之事著明者借論之漢室不綱有曹操孫權劉備雖皆天生之英雄也使其終無分地而浪戰於中原則必有吞并滅亡不支者若前日劉項是也曹公興於袁紹之亡是也而以一天下分裂而三者實自乎荊州之分隸也嗚呼荊州實能分裂天下而三者也

曹公不急於得關中而急於得荊州蓋以韓遂馬超必不能保關中而關中非我有而誰有哉荊州雖暫為劉琮之物而亦未必為我物也陸攻則遠水攻則險彼孫權劉備其遂得之乎無幾何孫權雖可以得荊州自以居京口而遠有所不給則以資劉備備得荊州則得巴蜀孫權以劉備禦曹操於荊州而保江東三分之勢定於此一州矣曹操於宇宙間有鞭撻之威尚何所懼者及聞劉備得荊州則大懼矣方作書不覺墜筆於地也

惟曹操能懼其可懼者也昔之一荊州今之瀛定并門
三荊州也又可不大懼乎曹操其後回軍濡須恐江濱
郡縣為權所掠乃詔其民內徙彼久業南方而不安一
旦彼土之民相與驚惶渡江而逝廬江九江蘄春安陸
諸郡皆無民矣北人乃得居其屋廬耕其田野江濱之
郡于是乎有民為魏死守矣如曹公之志則未易以吾
三鎮之重地齊民悉棄之也古今識者皆恨唐不能有
河北而委之於三叛不知唐失河北於三叛之後繼失

秦隴河湟於吐蕃自鳳翔西門之外即為吐蕃之境顧
無自而遠制大河之北也今京師視瀛定并門猶唐長
安之視秦隴河湟其利害不亦逼乎嗟夫唐失隴右
而不能制河北今失河北而寧無西師之憂乎又將何
以制之乎言及此則三鎮之利害又急於漢之荊州也
且唐之失河北為害也緩唐之長安視河北而遠也今
之失河北為害也急今之京師視河北而近也邇遠之
間緩急之勢不得而同也亦已明矣今之京師是謂大

梁與古昔帝王之都自亦不同何則西漢之都雍因秦之舊保河山而制諸侯婁敬建言於前賈誼重陳於後實因一國而為都也東漢之都洛謂先朝為未盡善乃遠奉周公之志以洛陽者天下之湊也因天下而為都也隋則初盛而都雍其後衰而都洛唐則以雍為京都以洛為別都皆未有及宋都大梁因天下而為都又平坦顯著於洛陽之都也其諸帝王之舊則夏都陽翟商都景亳我介於二者之間也其引湖海舳艫於枕席之

上而走山岳騃駭於俎豆之間役夷狄萬國琛幣於郊
坻之邇者實以冀趙魏晉之重為天下四方之鍵也今
冀趙分而魏晉毀則其憂不在河北而在京師顧執事
可不念之乎中山之地則保深祁廣信安肅順安永寧
八州軍兵則五十八指揮三萬八千三百四十八人高
陽則莫雄霸恩冀倉永靜保寧乾寧信安十一州軍兵
則七十七指揮四萬二千五百八十人太原則忻代二
州寧化奇嵐二軍控契丹之朔雲麟府二州守河外嵐

石隰三州火山保德二軍阻河扞夏國之綏州凡十有二州軍兵則一百六十六指揮七萬二千九百人嗚呼可謂重矣故曰瀛州者有瀛海之富於天下也定州者可以大定天下也并州者可以并兼天下也名不虛得亦未可忽也若不得保北之重鎮而弃之竊恐江介之民魚蝦之俗先叛而後服者足搖而心生矣且曰非我不敢棄朝廷而往降恐朝廷之我棄也故曰所憂不在河北而在京師也今日陛下赫然明詔俾三鎮無棄其守

如故且命四擊金人實天下幸甚古兵法有之示弱者
剛勝示怯者勇勝示緩者速勝彼深入者我以主勝彼
兵老者我以壯勝甘言厚幣以餌之者我以逸勝縱敵
於歸路者我可以大得志而無不勝今金人深入皆犯
此七者之禁也願詔急擊之無怠且今日金人之北歸
與契丹澶淵之逝事體不同章聖皇帝不以殺為武者
也今皇帝陛下必行天誅則武矣

繳進出狩議狀

臣伏念能言之士不能有言于危難之時逆耳以謀犯
顏以諫者烏在乎能言也哉司馬相如王褒楊雄之言
迂於事而近諛董仲舒賈誼劉向之言切於時而盡忠
君子寧忠死而不諛生也臣至愚且老嘗應元符詔上
書坐邪籍罪廢者二十餘年今茲幸遇陛下即位復應
詔上書蒙明恩擢自冗散所命之官皆極士林言語之
選未幾自取罪斥流離寒饑辛苦道路頃聞金人南下
口言和而力攻戰動輒得意知太平之人仁則益恐怖

不支矣志士於是日益可憤而實不以為懼也臣因自計曰與其死俘亡之中寧若死忠謹之言輒有出狩議一篇謹繕寫以聞惟陛下聰明赦其死而憐其意以來天下能言之士不勝幸甚

出狩議

議曰居其所而衆星拱之者北辰也乃一日不居其所隨衆星以流焉天將無四時也商詩不云乎邦畿千里惟民所止肇域彼四海非邦畿以止民也實止民以為邦

畿也其能止千里而近者斯能域彼四海之遠也若夫
千里不為我畿則四海將為他人域矣周詩亦曰价人
維藩大師維垣大邦維屏太宗維翰懷德維寧宗子維
城無俾城壞無獨斯畏傷厲王失是道也民不懷德而
城壞矣烏覩文武成康之績哉是故國君死社稷者禮
也後世有以身保一州勇悍一城者為希世偉烈無他
焉不學禮之過也聞之國君死社稷矣而太王去邠詩
人不刺焉何也曰太王去邠以興周也時則商人衰世

也紀侯大去其國春秋又不貶焉何也曰紀侯去其國以存其祀也時則周之衰世也若使當商周之治君盛世則紀侯者玉帛朝貢之不暇寧論其國去不去耶春秋於紀侯信不貶矣而於周王則有譏焉書曰天王狩於河陽蓋天王無出出則自絕於天下也天子之孝在天下諸侯之孝在一國所任不同所責異也漢文帝時老上單于自將十四萬騎入蕭關燒回中中宮侯騎至雍烽火通甘泉宮可謂危矣帝乃躬擐甲胄思親征焉其

後匈奴復大入帝親勞軍至霸上及棘門而在細柳則
皇輿屈而不得驅矣未聞其輕出狩也既而景帝立一
日中七國同反帝命周亞夫竇嬰將三十六軍以伐之
有張羽之力戰韓安國之持重韓頽當之功冠諸侯而
趙涉劇孟鄧都尉輩為之謀畫七國王侯之首可指日
俟之也惟帝之斷足以誅御史大夫晁錯其勢足以使
太常袁盎使吳其明足以容周亞夫之不奉詔以梁委
吳亦未聞其輕出狩也唐明皇有始無卒昏淫不道固

非文帝之比而國家之盛不減文景時也一旦安祿山以范陽平盧河東之師率同羅奚契丹室韋十五萬衆反范陽取河北陷東京克桃林而潼關失守則不告宗廟不顧九族不論百官身與百官數十人揭衣而奔才行四十里而無食飲與征徒並饑寒越明日軍士不肯行則斬宰相縊妃子僅行中道散亡者衆賴劔南騾綱至以甘言強之而前不敢言騎騾之疲也受辱於饋食之田父訴誠於獻酒之微臣悲歌酸鼻

闕

而不悔唐

室自是傾矣其後肅宗幸岐代宗幸陝德宗幸奉天皆
修明皇故事也未有僖昭之出則春秋所不貶也昔祿
山之初叛也四方郡縣不從賊者皆倚東平太守嗣吳
王祗以起兵其終賴太子即位於靈武以固天下之基
業則民心於帝豈不願其留而病其出哉梁武帝區區好無
益之名窺無術之利專以登叛人為謀末納侯景十有
四州之地自謂坐獲非常之大功也不知其相朱异納
景之賂其子王德通景之謀長江不足以為險而朱雀

航石頭城與浮苴等也景逼帝坐白刃交前而景徒能
焚宮室辱妃主殺百官曾不自保其首領也梁室不碎
於侯景之手者武帝坐朝如故而未嘗議及奔亡苻堅
之秦軍聲國勢據中原以威百戎非江左可擬也銳氣
以攻衰微之晉戎卒六十萬介馬二十七萬下蜀漢之
舟師擁幽冀之陸騎軍十萬里齊聲並進晉謝石之師
不足以當其二十之一而石琰幼度伊輩風流清談之
師不足以當苻融張虬慕容暉垂姚萇輩熊虎百戰之

將而融陣逼淝水從幼度之誘一動而奔潰不可制之
融擒而堅僅以身遁姑得道洛陽而入長安曾不安静
而復出五將山姚萇執之幽於新平別室而縊死靳傳
國寶以陳義問伊偉以憐才於是垂與子寶中道叛而
燕復以興乞伏父子繼以隴右叛而秦以立句町王以
河南叛姚萇以萬年叛慕容沖起兵於帳下慕容暉變
發於會中誠可懼矣向使堅收散卒不去長安任權翼
苻越之中謀督張虬石越毛當苻飛龍之力戰則雖有

五將之辱新平之禍使秦遂亡乎執事者鑒漢文景不出而隆盛唐明皇出而衰亡梁武不出而存苻宣昭出而亡則一反覆手間天下之利害斷可知矣又有往古實迹可按而為執事言者燕太祖文明帝以新造之邦出師小勝而激石虎之趙大陣以臨之一日亡其二十餘城於趙趙兵將逼所都之棘城旣懼欲出亡其帳下將慕輿根諫曰王一舉足則成彼趙之王業中趙之計矣今國家固守堅城其勢百倍事之不濟不失於走奈

何望風委去為必亡之理乎玄菟太守劉佩曰事之安危係於一人大王當自強以厚將士不宜自弱也其謀臣封奕曰虎凶惡已甚鬼神共嫉禍敗之至何日之有今空國遠來攻守異勢戎馬雖強無能為也頓兵積日釁隙自生但堅守以俟之耳燕乃以劉佩之力戰大敗趙師終為大國視石虎不義以死也是尤宜今日之當知者也所謂黏罕幹離不者非石虎之儔也其輕進易退則過之我不可一舉足以自敗而成彼計惟堅守以

成百倍之勢而視其一旦瓦解可也況我祖宗基業之固宗廟社稷之靈今天子之勤儉圖治固非新造之燕可同日語也亦竊有可懼者今之謀臣視封奕如何其戰將視劉佩又如何執事者未宜忽於斯也又如燕幽帝慕容暉屢敗於晉大司馬溫之師矣溫乘勝至枋頭暉懼焉與太傅評謀奔龍城賴吳王垂請出戰曰若其不捷走未晚也果大敗溫於襄邑而得晉之壽春焉此則危甚矣無足為執事者陳之也今之謀臣必不為慕

容評而戰將視慕容垂又如何執事者復宜念之也是二者蓋有前比矣光武初在河北得邯鄲信都二郡之助而兵衆未合議者多言可因信都兵自送西還長安獨邵彤曰若明公無征伐之意則雖信都之兵猶難會也明公既西則邯鄲城民不肯捐父母背城池而千里送公其離散逃亡可必也光武不復西而卒因二郡以一天下也方光武創業之初猶不肯散亡二郡之衆而固守河北執事者謂今累聖重光之基業可不恤京師

之衆勦力而固守天下乎嗟夫旣去棘城暉奔龍城則燕雖興而復亡也光武輕去河北則不能中興而漢不得復有天下也執事者幸少念之也或曰晉元帝之亡也保江東而興王業胡為而不可曰元帝以琅邪王渡江而即帝位非驅黃屋以東巡也其所以即帝位者又豈藉江山之固哉中原名德之士王導周顗之屬不忘中原之故國相與慷慨垂涕而立宗廟於荊棘之中耳是時東晉之地南抵壽春北極彭城東至洛陽如使元

帝居洛陽之舊都收中原之遺英則彼劉淵石勒輩果
何有哉請以二事明之東晉之初興也弱矣劉琨遙奉
朝廷之威命無日不戰於劉石間幾興而敗且使琨不
死則滅劉以興晉陽殺石勒以固河北而洛陽長安皆
晉之歸也祖逖志在中原琨之所畏也其在豫州百姓
襁負而至將士樂為致死力敵人不敢窺兵石勒遣吏
護其母墓黃河以南復為晉有略地千里復戶萬計惜
逖不能自成其渡江之志而卒也晉之末尤衰以大司

馬溫之師猶足以至霸上劉裕之師又足以入長安況在元帝初興乎其初則未有定分爭先破竹之勢也其後則強箭之末飲羽之勢也琨逖二人者元帝可用而不能用以一天下者也溫裕二人者不生於元帝之時使之効忠佐王者也執事者當念琅邪王渡江失計如此況以天子之尊為江東之舉乎豈不惜哉昔人所謂日前可驗天下共知之事區區所陳往事是也其在本朝則章聖皇帝因契丹再入河北不西狩蜀不南狩

金陵上有畢士安之深謀下有高瓊之竭忠而成之於
寇準之決策不復徘徊而徑幸澶淵其流福天下至今
賴之也是則不待說之之言而執事者宿知之矣謹議
錄出狩議呈中丞狀

右說之放逐道塗饑寒曳杖不能忘王室而作也伏惟
中丞特以天下安危利害為念不以老者之言為昏悖
下同田叟巷童之謠頌一為省覽幸甚

靖康初上殿劄子

臣伏觀陛下即位之初發明詔修祖宗故事天下幸甚
臣竊以祖宗制度宏遠未易究觀必先得其要以盡其
微恭惟太祖皇帝受天丕命削平僭亂混一區宇基業
太平亶出百王之上宜世世守之罔或差忒儻少變易
則禍亂隨之周人謹文武之績漢家必曰天下者高祖
之天下又曰此高皇帝之家法也有宋之祖太祖實曰
同符繼而太宗皇帝躬甲冑從太祖不自以為能常視
若不足惟太祖之法令是守恐少失之設如太宗時即

得好奇務新之士變更太祖之規模竊恐五代之變未
必不復出也重惟太祖太宗一德同功古未之有宜乎
真宗皇帝肇建南郊並配之儀國家之盛曰咸平景德
仁宗恭儉在位四十二年日慎一日未嘗一言自大
未嘗一言自矜惟畏民愛士今四夷猶聞其風而歎息
焉國家聖聖重熙率由此道也臣愚願陛下無忘太祖
之創業太宗之善守真宗之清淨仁宗之恭儉以增七
廟之德天下幸甚取進止

二

臣聞王制司徒之職曰一道德以同俗傳曰剛柔緩急
聲音不同繫水土之風氣謂之風好惡取舍動靜無常
隨君上之情欲謂之俗是俗可同也風莫之能同也五
十年來學士大夫不約而同稱焉曰一道德以同風俗
同其所不可同者遂至設重賞以禁民之口逞虐刑以
奪士之職人無強弱必責之以隨順使辟士無大小皆
課以新義之熟與不熟專利不遺纖介黷兵無有寧歲

使小人得志君子失措熾為尚同惡異之政貽天下後世之害實自乎顛倒六經飾六藝以文奸言之故也臣愚望陛下深留神加察取進止

三

臣竊以國家受命市不改肆遠邇晏然文明之化一日而洽於四海其號令即先王之詩書也其制度即先王之禮樂也所謂人文化成天下者古未之或有若其得人之盛文章則王禹偁楊億劉筠晏殊歐陽修蘇軾經

術則胡旦王軫李建中高弁孫復石介史學則趙師民
孫之翰王洙劉敞劉恕小學則徐鉉郭忠恕李建中賈
昌朝歷數則孫思恭劉義叟蔚然名家矣古之作者未
易加諸後之來者亦難以繼或者乃有士久敝俗學之
嘆身作新義誘之以勢而劫之以利其勞亦至矣無乃
壞國家之文明聲教乎臣愚願陛下深有察於此也取進
止

論神廟配享劄子

臣竊以為善觀聖帝明君成天下之業者不觀其迹而觀其志恭惟神宗皇帝巍然之功在天下者孰不覩矣其末年所以為天下後世慮者未易為單見淺聞道也神宗皇帝即位之初却韓琦論新法之疏至于再三逮琦之薨與兩宮震悼躬製神道碑念之不已每對臣寮稱琦為社稷之臣方即位初時深欲相富弼弼辭以疾退居洛陽弼在洛陽多以手疏論天下大利害皆大臣之所不敢言者神宗欣然開納賜以手札曰義忠言親

理正文直苟非意在愛君志存王室何以臻此敢不置之枕席銘諸肺腑終老是戒更願不替今日之志則天災不難弭太平可立俟也嘗因王安石有所建明而却之曰若如此則富弼手疏稱老臣無處告訴但仰屋竊歎者即當至矣弼之薨神宗恭製祭文有言曰言人所難議定大策謀施廊廟澤彼四方他人莫得而預也又其即位之初也獨以頴邸舊書賜司馬光逮光不願拜樞臣之命而歸洛陽修資治通鑑隨其所進命經筵讀

之其讀將盡而所進未至即詔趣之熙寧中初尚淄石
硯乃躬擇其尤者賜光書成賜帶乃如輔臣品數賜之
嘗因蒲宗孟論人材乃及光曰未論別只辭樞密一節
自朕即位來惟見此一人在元豐末靈武失利神宗當
寧慟哭大臣不敢仰視已而嘆曰誰為朕言有此者乃
復自發言曰惟呂公著數為朕言云用兵不是好事豈
咎公著嘗爭新法不便於熙寧初哉元豐之末將建太
子慎求宮寮神宗皇帝詔宣諭輔弼獨得司馬光呂

公著二人蓋於是時王安石呂惠卿何有哉至於厭薄
代言之臣謂一時文章不足用思復辭賦章惇猶能為
蘇軾道上德音者也經筵蔡卞愈為恍惚蕩漾之說上
意殊不在逮趙彥若以經侍則皆忠實純朴之言也上
聽之喜因問曰安得此說彥若對曰先儒傳注臣得以
發上益喜其在政事因韓絳自請前日謬於敷奏之罪
乞旨改正上欣然嘆曰卿不遂非甚好若是王安石則
言害臣之道矣元豐末不得已創為戶馬之說神宗俯

首歎曰朕於是乎愧於文彥博矣王珪等請宣德音復曰文彥博頃年爭國馬不勝乃奏曰陛下十年乃思臣言珪因奏曰罷去祖宗馬監是王安石堅請行之者本非陛下意也上復歎曰安石相誤豈獨此一事安石在金陵見元豐官制行變色自言曰許大事安石略不得預聞安石漸有畏懼上意則作前後元豐行以諂諛求保全也先是安石作詩義序極於諂諛上却之令別撰今所施行者是也神宗聞安石之貲命中使甘師顏賜

安石金五十兩安石好為詭激矯厲之行即以金施之
定林僧舍師顏因不敢受常例回具奏之上諭御藥院
牒江寧府於安石家取甘師顏常例安石約呂惠卿無
令上知一帖惠卿既與安石分黨乃以其帖上之上問
熙河歲費之實於王安石安石喻王韶不必盡數以對
韶既叛安石亦以安石言上之不知自昔配享大臣嘗
有形迹如此之類乎安石不學孔子春秋而配享孔子
晚見薄於神宗無乃為國家政事之累乎神宗一日盡

釋市易務禁錮侏人在京師者無慮千人遠近聞之罔
不手足舞蹈歡喜神宗嘗恨市易法曰百姓家大富者
猶不肯圖小利國家何必屑屑如此耶嗚呼上天若賜
眷祐神宗更在位數年則市易法之類躬自掃除之不
使後日議者紛紛知自為謀而不知為聖君之累乎有
志之士痛心疾首不能已者正為是也陛下圖治之初
近當奉上皇求言之詔遠當成神宗晚歲之志則天下
幸甚取進止

奏審覆皇太子所讀孝經論語爾雅劄子

臣聞春秋遵一王之法以正天下之本與禮之尊無二上其旨實同蓋國之於君家之於父學者之於孔子皆當一而不可二者也是以明王罷斥百家表章六經大儒推明孔氏抑黜百家今國家五十年來於孔子之道二而不一也其義說既歸之於老莊而設科以孟子配六經其視古之黜百家而專明孔氏六經不亦異乎前者學官罷黜孔子春秋而表章偽雜之周禮以孟子配

孔子而學者發言折中於孟子而畧乎論語固可歎矣
今皇太子初就外傳之時命宮寮講孝經而讀孟子蓋
孟子不當先諸論語者也如以孟子先諸論語豈所以
輔導皇太子天資邁世之令質而視之以一德哉臣愚
切以為宜講孝經而讀論語恭俟講說孝經畢日復講
其已讀之論語則其入德亦以易矣或間日讀爾雅以
視文字訓詁之本源而明天地百物之名實先儒謂爾
雅本是周公訓成王之書信不誣也臣愚流落衰暮之

餘荷聖君一日非常之眷自太子左諭德授以詹事苟有所志不敢無犯而有隱臣愚自度此言一出必遭世俗侮謗不淺矣其所恃以安者陛下聖度旁燭萬化之微而不為世俗所惑也重惟太子天下之本而一本於孔子之經則宗廟社稷之流光不亦偉乎臣以狂瞽獨見之言干冒黷戾不勝惶懼屏營待罪之至

舉卽伯溫自代狀

右臣伏覩某官卽伯溫其父洛陽康節先生雍國史有

傳伯溫束髮謹父庭之訓皓首推王度之恭況乃早客
司馬光之門能教子弟以禮法若使晚與中興之偉績
必復士大夫之廉隅臣所不如舉以自代

謝罷中書舍人表

伏奉詔命罷中書舍人兼太子詹事依前朝議大夫提
舉西京崇福宮者進退甚遽而難知行藏有素而易曉
託大明於日月保至德於乾坤欲訴言辭橫流涕泗伏
念臣受才極拙適用孔艱但知平進於終身豈敢妄求

於他徑方元豐之唱第神宗喜其家世之姓名逮元祐
以劾官羣公薦以文章之科目未嘗露才以投刺而乃
應詔以上書有司第於奸邪之中仕路困於饑寒之久
豈期春雷之震發恚俾敗穀以懷生人謂當然自期亦
爾果蒙甄錄洊辱寵靈世紅藥以代言仍青宮之端尹
難逃機於巧匠漫自竭於拙工昧辭頭當徼而例行失
職守負慚而引退不敢以故事為請恐相軌而摧轅況
嘗衰老以思間甘屈心而抑志干冒黼黻辜負睿知未

報德於丘山欲圖安乎螻蟻雖嗟無補於辭掖頗却盡
瘁於儲坊負愧噬臍初無嫌於纖芥銜思沒齒終有賴
於涵容此蓋伏遇皇帝陛下光宅堯仁克勤禹儉振淹
起廢而施惠兼收並用以求賢盡消朋黨之私大復風
俗之厚而臣首為誥戒自取棄捐不忍終疑於餘生尚
許復叨乎微祿察其易退於一語憐其戀闕於九懷過
夏首而西游凝望長安之日夢上帝而血面永懷至治
之朝

辭免徽猷閣侍制兼侍讀狀

右臣准尚書省劄子除臣如前臣伏念寓直之班國朝
之華選進讀之職儒者之至榮而臣仕宦數竒經術素
淺壯年不能自致白首亦復可憐但貪日月之新輝不
省桑榆之暮景敢忽輿論負此誤恩伏望睿慈察臣區
區寢寵成命庶得廉耻之士少裨清明之光

景迂生集卷三

欽定四庫全書

集部

景迂生集卷四

詳校官庶吉士

臣

初喬齡

侍讀臣孫球覆勘

總校官編修

臣

王燕緒

校對官中書

臣

王慶長

謄錄監生

臣

姚階琴

欽定四庫全書

景迂生集卷四

古詩

宋晁以道撰

對月偶成

元祐丁卯年二十四為兗州法掾考
試歷城與劉跂斯立李深資道唱和

凡二十六首內
六首見律詩卷

我屋天之東月從海西來不解傳消息起舞興悠哉千
里玉繩斷萬頃金波開為我清皮骨憐我兀塵埃座有

玉山人欣然共徘徊談笑喜復喜詎必蝦頭杯

還資道斯立詩卷

秋風吹一葉送我過東山山高日出遲露重衣裳單爰
到濟南郡端士莖與蘭扁舟八月水唱酬清且閒憐非

郭李客便了取詩看

便了乃斯
立童名

馥馨蘭莖語令人有愧

顏未見半豹書安敢道一斑分在婢子科何以能追攀

和斯立見還詩卷

神仙劉子夏不愧許遠遊今日秋風客襟度更為優如

何琅玕紙亦作李相投釋之還在手愛涎隨不收霜
渚望何限鳬鵲遠嘯儔金篦識清揚玉麈見風流新知
雖云喜果勝故知不相期不用名散盡人間憂

和資道讀王績傳

飛廉有駿馬卒歲得壯遊先生用自況散髮汾水頭時
時到醉鄉萬彙如蝸牛板築杜康廟配饗酒家流此意
誰能解空令兒女羞為問闕夫子若何為獻酬

和資道讀賀知章傳

少陵愛賀公爽氣不可致寧向水底眠不作塵中士謫
仙見長安狂言隨意至換酒解金龜安知天王賜二子
少可人欣然得朋類我實異世客遺編勞補綴念昔遊
稽山頗愛石上字再拜式畫像物來見真意翰林有諸
孫能與我同契

馬上睡

前驛得駕馬據鞍可天隱青山隨我行夢寐亦清省此
樂世所無蝶化猶未甚須信忘機者在在得安穩

宿會真宮靈休廳

我雖養佛胎未必有僊骨如何羽衣人而亦容我宿岱
岳若宗社徂徠隱敵國沈沈兩山間真會駕白鹿仙子
嘯清風玉女佩金籙擾擾人間人悠悠欲五欲

送斯立入京

我見劉潁川昏困不暇寐忽遇便娟兒白日思寢被此
頭各未白相逢當有地詎惜草草別但嗟言負意是時
菊正花迸散青鉛淚搖策如騎電到國何容易菜衣媚

家府芳躋延國士相知問阿儂為言只爾耳

贈別蓬萊簿林希孟子醇

吾友陳無已文會班生廬是時與林侯有若同隊魚相
見元無約相別詎有謨那知數歲後聚首如當初眷言
二三子今來安穩無意氣充眉宇比昔姣且都乃見松
與栢不似柳與蒲憐我守枯禪談笑使甘腴何期又為
別淚下青霜俱男兒志四海不辱黃金軀試看習主簿
窮悴能著書

擬古與韓某叙別

燕雀常相隨鴻鵠中路迷豈無岳與海不如瓜與葛食
梅令人酸食冰令人寒一聞布帛語結髮得儔侶黃蘗
染素絲苦浸為別離別離近不遠後會猶未期

資道俾予賦試劍山詩馬上承命作

青山羣若好此山何清特如見孫登輩高聳不可及山
神亦喜我輕風鳴馬勒馬上欲高哦才窘開口澀城墉
半夜深樓闕中天闕六曲屏風張五兩布帆屹蓮柄生

早陸松角自空植偏將司斥侯中軍羅矛戟道冠不著簪
女鬟未勞櫛碧衣翼而趨青童拱以立風雨若可搖日
月去無迹出此摹寫語敢謂得百一亦欲縱筆書南山
詩見嫉

和資道故山驛早行

欲識混沌初請君觀曉山浩蕩有而無雲烟往復還流
水意更新四顧復聯攀日馭慎莫出我要常蕭閒

和資道山路見菊雜言

桃李不如菊露下花開意自足菊亦謝桃李妖葩艷萼
能入俗把菊比君君更清愛菊肯教陶令獨君今漸作
富貴家平頭奴子紅腰束人誰敢號髯叅軍見者面柔
辭氣曲惟有禪翁向晚秋東籬細步想風流

遊靈巖山寺

昔愛屏作山今愛山作屏環曲不可數兩目徒熒熒須
臆背負巖恍怛面對陁陀聚陣脚馬羅列仙女軀秀色
非有無花氣自芳馨翠麓下靡靡危峰上亭亭借問深

幾何飛鳥中暫停衆異者明孔白晝觀辰星霜令殊未
酷黃蘗間青青連岫鑲寶符重壁藏修靈世俗那得見
見形不識形言念朗法師於此老禪扃應化今何到空
餘石上經我如夢中遊夢夢入杳冥爾來塵滓醉不覺
一朝醒下山如夢斷獨疑在茅廳朝雲到人世飄飄細
雨零

和資道巖巖亭二首

我來遊此亭豈無高陽里形神既生生吉祥斯止止我

無古人愁古人無我喜頗恨桑苧翁不來嘗此水

其二

昔年蜀武侯泣下蕩陰里何如無事人一亭欣所止悠然太山岑相對真可喜不須樽中物且酌巖下水

奉高道中作

雲埋樹林遠雨添山色重我馬自知行秋風更相送悠悠鄒魯間此意將誰共明朝是別離想此如殘夢

望山作

望山山在背不覺首屢回策馬欲倒行道路良艱哉白
雲尚相寄為帶山色來昨日登臨處今日誰徘徊安得
玉女水為我洗塵埃不解伴松老寧忍被鷗猜日與物
為邁此眼向誰開

晚日

晚日勸我行我欲留晚日長途行不近僕馬有倦色人
生為客多誰解老一室果有桃源人應遭渠笑叱

贈江子和兄弟

壬申二月
時在蔡州

聞道去年大雨雪今年園林著花遲梅已寂寞桃淺深
膠序閉門那得知故人南來將二季屋裡衣香生春姿
黃蜂紫蝶自顛倒從容却話初別時二季未幾能許大
我曹諱老寧非癡酥酪醍醐俱可口何但療我渴與饑
本朝亦有江金紫誰道陳留人物衰

江淹為金紫光祿大夫今舍人亦贈

官此

有客從伯父大人問說之者伯父報之曰吾姪
家中焚香讀楚辭耳因得詩一首拜呈

蘭菊不易友孔鸞難與儀春事漫嬋媛焚香讀楚辭北
斗仰欲援南征俯自悲胡為不痛飲未肯歆其醺君之
門九重舉世莫余知世父誤見賞中情自有奇更願餐
芙蓉遠舉驂白螭

元符二年十一月十六日趙德麟檢校諸邑李
方叔自鄮來會中廬游靈漢寺觀飛泉窮水
所出涉龍潭遂至上洞尋火而入路窮乃回
歸息巖下巖洞泉潭前此未名嘗見襄沔記

郭璞游仙詩謂青溪道士鬼谷子所隱在義
清縣義清今其地也巖勢天巧如觀音大士
所居潭抱石而曲泉懸級掛空若衝牙珎璜
垂而有聲遂名洞曰清溪巖曰補陀潭曰玉
玦泉曰珠佩說之寄題四絕句

不到清溪路人間千過春青溪人不老應憐郭景純

右青溪洞

補陀風月在處處得真居一六同妙湛三千皆宴如

右補陀巖

大夫既授袂捐之湘江中彼波到此潭寂寂睡蛟龍

右玉玦潭

佳人諒誠素鳴佩若可取王孫忘情事不學鄭交甫

右珠佩泉

客有傳黃戎州三絕句者因次韻

朝歎烏皮几暮歎木樨床勞我情不堪念君德不涼
驢技已過目戎衣方駭心文章端自誤痛悔空在今

名大不忍殺罪大不以赦荔子紅滿山身落鄉人社

喜魯直還用前韻再作

梵志問故鄰木蘭坐舊床去恨已斷絕歸意更淒涼
鷓鴣不入饌松栢有常心歸來應未老但道古猶今
君有非常罪幸此非常赦收身黑水西重入白蓮社

又再作

多情楊畔兒芙蓉生繞床舊屋君未歸蒲池已淒涼
世人不我與自契黃農心竟復何遠近一瞬萬古今

負罪臣宗元移書數問赦僅如鴈往來羨君還里社

君莫惡行

四月十四日禱雨紫
山回聞韓相公拜

寂寂山城已過春黃鸝紫椹意相親天公奈何不肯雨
小麥含秀安得吐聞道天公大仁聖風伯何能回雨令
恐是風伯老兒凶長塗未許騁羣龍前年流草有餘觜
誰言今朝尚憂此內降白麻出上閣新相為霖君莫惡

縣樓對山作

山色日夕改我樂豈獨今相羊非一意開簞枕遙岑楞

伽懶焚香離騷幸可吟吏隱兩已適虎鼠都不任詩酒
客亦惡樓下那足尋可憐謝玄暉惆恍論此心

趨府馬上悠然思陳無已三兄成詩寄之

瓦釜毀未棄黃鍾幸且存於焉正律呂誰為到崑崙相
思出苦淚東漢太丘孫聞之在徐州無衣掩柴門亦賦乞
食詩饑瘡故拙言靖節非此夫如似校靜喧頗領不悲
傷自知美蘭蓀龍伸能蛇屈土不蝕璵璠魴鱖書懶寄
天公牋可論名不登吏部欲報天地恩明光出須臾一破

萬古昏蒼生訖康濟坐覺君子尊淨盡城上烏變化北
溟鯤豈但喜囚冠故亦慰累魂我既美子志為子盡嬋
媛吾曹寧餓死終肯傍祭墻孔明與荀賈豈不共中原
崎嶇入巴蜀雅志正本根柳子一失此羅池為鬼冤問
訊寄此辭飽腹何時捫

欲自邯鄲趨府復從中山行覺風異常馬上作
山行豈不惡清音興自長風從巖嶽來不比人間涼浮
涼誇湛露屈子自悲傷披襟青蘋末玉也媚君王歡見

西王母笑酌白玉漿當今第幾人此樂可共嘗車馬邯鄲道側身一相望為謝南亭女世方一作萬里賤鈿黃

秋來庭下雜花盛開對之感懷作

春花擢翠榦秋花披芳叢叢花都且閒天質不為容寧邀兒女賞本自能淒風持之奉君子令德晚更崇

秋來

秋來頗自適撫此清收時不假絕交論聊吟招隱詩山阿新橡栗朝廷舊臯夔早晚罷給散恩偕雨露垂

十月十三日自郡歸山中寄周秀實昆仲

陰靈識陽月怪樹知窮谷路轉山迎人崢嶸失南北回首人間士匆匆今何役嗟子此行李志尚亦云獨世事兼渭涇清濁俱所欲耿介自小人大匠死繩墨伯仁莫妄評阿奴不碌碌

忽蒙秀實內黃賢尉寄書期許稠至有經世之

語輒代書為謝

此君主
張隨州

歲宴慕羣侶魚鳥各知息故人音書來憐我此時憶忠

言開靡靡豈但問寢食我有山耕願久矣君已得中道
忽獻書明時思自立一官雖漫與頗知民苦疾豺狼不
當路雨露發天秩植杖聽班詔去暴看甲乙閭閻心欲
速廊廟慮匪棘恨不死褚淵歎嗟起安石固云小人鄙
未易君子識悠悠定誰堪世事兒女劇君才雄且銳欲
振排雲翮但恨張公子齷齪難與適功名良可圖燕然
銘謾勒

趙德麟書來言黃九聞移命後徑遊峨嵋慨然

一作
感懷
有作

囊產久無賴，相羊忽有期。
野馬脫羈日，逐客賜環時。
鄉國眼中見，伸肘猶云遲。
夫子獨不爾，西復到峨眉。
初非身世謀，無淚竹枝辭。
豈是軒冕人，要路莫相疑。
歸來舊臺閣，風霜嘗路岐。
曰：予有未契斯焉，定何之。
興懷白象士，復自話別離。
萬行端難渝，短軸賞新詩。

魯直久許以短軸寫平生

得意詩
見贈

無已初除正字以詩寄之

平生阮步兵口不道臧否每笑謝著作自是雌黃口閉
門秋草多金風搖白晝忽傳黃紙書校藝羣公後執鴈
有楚越佩劍無左右難畫渾沌眉遽識齊宿瘤彭城陳夫
子笑我顏何厚為語陳夫子人生無不有

寄陳叔易

春色今似我已老不足愛花隨浮雲空只有蜂蝶在
問春歸處無踪跡腸斷江南與江北青春不似青山常
有情處處相逢好顏色山中故人頭亦白何敢勞渠坐

相憶願得春風一夜萬丈高乘之歸去舊巖谷

答趙德麟見招之作

王孫囚冠安穩無骨清肉健今更癯學似東山何所歎
才如北海莫言疎幾年漢上狂歌散今日山前幽夢餘
消息遠來知有意碧巖却要子來居

和十二弟見降羌過洛

百代興亡吐谷渾聖主神謨不世恩解縛再生有孫子
無勞倚笑上東門

君莫惡行

五月十四日
聞右相出作

今年蠶母連萬箔屋邊桑葉渾不著彷徨何計救戢戢
出棄陌頭空涕泣前日初眠不敢語今日賤之如糞土
不容身老吐一縷回首室中殊樂苦何敢怨天不我與
亦太無情彼蠶母芙蓉錦上醉新粧那知有恨如許長
相公日戀北門樂迎候馬前君莫惡

夜行自戲六五言

觸熱襌襪幾許我生何艱哉九天星斗初轉汲井意徘徊

徊不解鳴珂帝所踟躕沒塵埃為問晚嫁盧姬一笑為誰開

題邵武軍泰寧縣葉恪循道清風樓

葉公賢父子清風何奕奕愛彼清風好危樓高百尺來從玉宇遠照衣光可擲桂葉尚飄飄蕙草不習習平生眼豁開脫然凌羽翼對飲伴明月故人念疇昔詠歌何移如援琴更幽寂慈烏遶雜樹雲溪非其匹華陽三層上松韻亦蕭瑟

始到無極作

徂歲若飛羽去矣不可招諒積寒暑多我髮覺脩脩是
身一枯木引憂自焚燒河山再遊宦鄉國夢魂勞友朋
不敢思得意在本朝弟妹天一方披衣泣中宵介拙取
如此罪侮肯相饒眷言此邦人不與我逍遙五日無羊
俎十日無魚庖啖我蔬菜慣妻兒嗔呶呶亦有寢食地
肘申瓦歎揺政自不容膝如彼風後巢當此仲夏時何
以謝炎歊前聞嚴君平氣和生涼飈但恐此語欺古道

久可嘲平生鄙潘岳懷縣復鬱陶靖節真吾師一去何
超超終期不自失賦詩吐牢騷

送杜通直乞罷無極南歸祁公之族孫

青堂帳下白題歌王師城外橫天戈白首國母契丹女
泣問王師來謂何將軍突騎擅府庫羌兒逃死獨峯駝
軍中即日拜太守兜鍪未脫羣冠峨杜侯別乘不願行
自言壯志今消磨顧豈不知金幣饒家有清風誓不頗
歸來南北信所之無極陋壤留則難却卷前志隨征鴈

回首三吳風景和
憐君骨法可學道
此身肯與樹婆娑
嗟予投憤亦不晚
君好訪我嵩山阿

趙君年十六作雨詩極奇艷可畏說之輒次韻
和之

天地綿綿寄一水
上有浮羽下累塊
時時出溢不自持
或濛或霏初有底
人間妄見得雨名
穴居那解知其際
既久天地如卵殼
漏下涌上潛相繼
日雞月蟾喜瀦污
力斂光明慳不費
茲復何時霖未休
萬牛高木同茅刈

朽屋歌光嗟莫支好逐苴浮連一穗何處紅藥媚芳妍
但見土花爭點翠被濕出門意慘慄刺舟庭下却車騎
茫然誰與散此愁文定諸孫森蓀翳青青稚齒口鼻哽
滂沱苦語天工棄趙生十四識稽康諒知前言非我戲
黃河多淘河之屬有曰漫畫者常以管畫水求

魚有曰信天緣者常開口待魚感之賦三詩
淘河復淘河后土激浪沙分波大石羽轉雜龍鼉汝欲
澄清力幾多官家費盡水衡錢萬夫政待河漪連天上

有河鵲以填不煩汝淘髡其顛虛名覈何嘗休譏汝在梁

右淘河

漫畫復漫畫河尾沙軟啄一尺天生剛啄不解禿倦魚
薄淺幸有得謀拙力百費何處有金翅饑腸倚暮煙慚
愧信天緣

右漫畫

信天緣何為者非達亦非賢終朝開味不敢仰待魚落

味急下咽大魚變化小魚黠誰肯効命於爾前皇天日月高無心憐爾曹幾欲強求索豈不鑒漫晝

右信天緣

比日風雨甚異山下人云此六月龍會時也中
頂有會龍洞予嘗遊焉賦詩記其事今感之
有作寄趙德鱗

西峯掩映東峯明倏忽起滅令人驚九野雨足龍上征
六月正乃會瑤珥雷電斷絕風來輕鼓倡輦和終簫笙

虹霓舒旆雲搖旌萬龍天矯角崢嶸天門大開仙子迎
不比它邦時雨行中天有洞遺珠纓我昔酌泉探幽清
尚疑不然今信誠安得問訊驂騎駭脫去禁令朝玉京
相羊容與俯四瀛下呼我友何營營寒饑暑渴亦已更
胡不同我此長生

和澗上丈人石淙作依元韻

岷江將入海金山中丘攫近樵得鴈盪平地風落落
鬼一稱絕如夢理舜樂那知嵩石淙視彼削則削兩處

各瓌俊一旦俱磅礴水從嵩陰來到此幾谿壑勢盡劃
縱橫天地自開鑿腹背涵叢峰星斗俱漠漠波搖下嶽
崦雲度上岵嶠為山無麓趾突兀便可樂北首揖三頂
鴈行共遼窅睥睨萬培塿飄然風中籜莫言聚石耳乍
如五陰剝石觀煙霞生如蓮敷青腹非山亦非石水亦
非激躍癡龍有路寢醉蜃不收閣因得為人戲平何處
顏色乍或疑上帝宮益山映叢薄盲風吹下界塵世暫
斟酌又疑涿野戰行陣龍虎作過怒禁不散結此空黝

聖寧論八陣圖水來俄而却惜哉遊者稀元老情不惡
偶得雙頭蓮花戲作

君不見昭儀飛燕姊妹在漢宮同妍共麗媚赤鳳赤
鳳一日與俱逝長空又不見大舅小舅兄弟專晉亦何
有兄招千里兵弟殞一杯酒嗟爾芙蓉芬芳姿出水無
染稱瓌奇亭亭各映清漣漪高下淺深何不宜嘗遊鏡
湖五月時目極萬疊青羅衣一花獨出擅朝暉譬如神
情散朗王夫人不爭鈿黃桃李春又如君子立朝廷用

而不倚自修正何乃反常為異失故態比之人事那足
愛只恐橫塘知我有恨處故教絕艷相並語莫言才氣
世無雙並蒂何如君看取不然戲我坎壈此世每不偶逢
人好顏開笑口

正月六日七日書所見

扶桑歲首當何辰荐視變異紛無垠既驚馬日不為馬
況復人日不成人咸疑白晝懸月魄譁言日月相鬪格
如負如爭天風愁似食不食自毒螫空裏黃埃下百重

日心黑氣交四磔不知何地匿陽烏人間百鳥競號呼
可憐海氣使如此杏梁瑞彩想中都

送許同年赴江寧知錄

風稜索索許子伯軺車督郵聲赫赫裔孫德似官亦同
獨乘瑞霧開羽翮金陵城裏春色多疑是六朝舊金碧
只宜細看後庭花慎莫垂淚江家宅吳驃那解醉離
腸嗟余自是思歸客荷葉開時楊梅熟江南江北遙相
憶

送檀守赴闕

昔時江南士人輕吳會正如長安洛陽論賓主自從九州花開一日來欣欣不復聞此語明州太守江南英信

美之鄉是吾土莫言只飲甬水便無情黃鵠排赤霄垂

翅一再舉御廚賜食紫駝峰情多猶憶馬夾柱依然夢

斷四明山花信風裏憐梅雨

京師有花信風

潮平驩喜浪婆兒

莫錯舉櫂新城江上去

公乞廬州

顧彌邵以其尊內翰所有歐陽公集遺侄季澈

賦詩篇末見及輒次韻作

昭陵人物一朝盛晚有醉翁為擬倫譬如羣鳳築羽翰
來下千里儀九成鳳歸樂絕天寥寥人間墜簡空垂精
可但光華開日月要識忠憤聳幽神虎頭本是當時客
教子傳孫無粟亭晝吟夜誦翁文耳池蛙何容聒正聲
得之不待金錯贈好守門律如時令君家此叔定不癡
莫厭家雞外勤請

送公望

竊獨悲秋霖江湖難為客短髮思歸時奈此西行色念
君諸王孫風骨秀而整衣冠舊諸生不羞見狹領邂逅
託未契君室獻可孫豈但姻婭舊有感風義敦君知前
輩好寧用文墨期醇意發高言請君誦吾詩

新作竹軒

齋壁值墨竹文蘓兩先生移根今何殊細度風雨聲妙
識前日意驩見此時情家山幾千里客恨倏似傾歸期
恨今晚像此葦茅楹故知江海夢常共月華清

感懷

甬東為客久心期日自昧秋風滄海潮尚餘桂江汨形
影悵已老頗識前人意柳子與沈侯超邁萬人外終日
常戚戚不知果何是我亦負罪臣視彼才藻愧
柳子厚詩云桂江日夜流千里揮淚何時到甬東先是沈休文有詩云桂水日千里因之平生懷

感興

越山無黃葉客子自悲秋朝來風雨惡白浪翻山頭歸
鴈不敢度何事此淹留少時笑古人耻為關外侯老識

古人意首山復首丘

秋曉

常恨日月迫復此秋云暮一歲餘幾何挽之安得住老
矣且勉學高談非所與貧賤苟不慙勢力則不懼涼飈
幸已多寧煩賦不過

題琦公讚光堂

山川固高深不掩珠玉光道人覺物者明明豈自藏奈
何一世中暝醉不我臧收斂萬古志風雨一茅堂問之

默不語詩成蘭蕙香山中多卉木有待而芬芳自憐年
少時曾與參寥行雲空流水遠天外有鸞凰白髮此種
種紅塵誰茫茫嵩少今卜築因之歸興長

琦公熙寧在西湖與參寥

諸人頗有因緣

風

一雨一月强天地同翳如大風半夜起上下痛掃除彼
蒼不自塵人力端奈渠不然何特異搖蕩此寰區癡兒
怖懼起無衣凍不蘓尚恐山岳仆寧暇小物謀人生所

托微造化仁有餘明朝木杪靜晏晏看天衢

夜雨

夜雨聽沉寂頗似嵩少時但怪越江上非此嚴冬宜重
岡迷積霰故山今付誰潮頭斯更健魚尾適自嬉獨如
客子何耿耿問心期

寒江

寒江不可望怖爾船中客波濤已無時風雨又幾日人
多冒險難我獨幸沉寂蛟鼉得意豪鴻雁歸期急吾孫

解蠻語政可一戲劇

夜大風

夜半江頭清客耳
髣髴鐘聲風雨裏
雨收風冷獨嚴威
鼉號龍戰江聲摧
政是夫差破吳時
鼙鼓百萬當者靡
白頭窩客奈此何
他年慣聽山之阿
惟彼天地之中央
岫壘谷麓寧厭多
吾土信美小人哉
何不處處作好懷

和胡少汲遊山

峭直漢大夫
伊余忝末胄
出不遇良媒
生本值惡宿
高

曾耀圖牒臯戾辱堂構十饑付羣兒萬恨闕孤味耻
爭市井日雅願農田壽感慨觸目新忠憤平生舊欲論
國中樞誰識不下輶偶為江湖遊喜見園林茂但恨老
子迂難復處士秀懷我故時人識彼往歲綬故人多零
落高義或邂逅有美中庸才願吸金蘭臭家住瀟岳雲
賦此小山犹纔顯便官豸暫處得僧驚大篇既錦舒小
章亦玉鏤本期古人知豈急今朝售又如五色丹必待
九轉就不近戀洛陽何憚遠勾漏神智此既澄世網不待

透明珠雀能銜黃金鳥解漱遺骨一國珍死鬢百草鬪
果誰真美惡亦曷定先後食栢莫分甘種漆要自守無
思梁肉肥忽厭藜藿瘦德義難沃懷情欲為穿溜小人
窘咫尺君子狹宇宙清音可相羊畏途肯宿留原憲不
知貧季氏徒誇富既皆百髮侵宜各素心究內不識織
紵外嗜飽飮餽一言可酣醉八月非醇酎苟適年少場
或落春花園武思揮日功文欲淩雲奏懶出櫪馬嘶惜
笑閨女侑巧意難幸得枯脰或遭叩君如此攘臂我此

甘縮袖歸見魯衛士未覺風宜陋每增輸心偽矧非見
面驟猿笑識巖穴雞鳴知旦晝吾語雖不媚厥意豈不
厚

謝周同年通叟詩卷

周郎既老曲不顧自作吳音歌白紵二三名勝能知音
傖翁得之嗟已暮玩之在手一載讀愈見佳處心愈妬
君乎瘖休無復鳴有才如許謗可慮鄉曲豫章皆奇才
直上千尺已摧去

送琦公詩卷

孤山教體外賦詩湯休上後來數參寥接手得宗匠東
遊四明山懷人增惻愴何言遇老琦二公論輩行但欠
主盟人汲古自清唱明年已七旬句法何蕩漾茲山近
蓬萊展卷到絕曠島子敢賡酬我正恨難傍

明人稱村夫為島子

次韻和法琦

野寺木魚午不響老僧乞米樵松根志幽思苦作詩戲
處身不忌如窪樽大軸視我正其欲尚恨近體意虛辱

卷四
報以五字陶謝家要看素絲難純束江頭梅雨滅槐火
我正思公慙飯顆復哦苦淡來惱予歎息有能無不可
枉是畫公出前溪猥效蘇州失故棲蘇州風流今不見
公乎老矣誰提携

書事

越天梅雨短長思嵩陽客子問歸期幽夢遠近徒猶夷
細字老眼厭紛披身將隱矣又何為且舒縈滯為客時
故自平平欲誰語

連日酷暑異常攄悶而作

寒暑平分東南之微何多暘哉遠望炎洲近觀火井相
與朝燼而夕灰名曰冰紈霜練服之一縷如十襲而信
衣冠之不能敢疑夏祖之居會稽短髮文身自蔽以草
萊浪婆兒住世世其道常年不如是誰復憐北客此日
真憔悴深山乳虎想騰倚清風不來空嘯死安得人如
葛稚川脫身直下坐井底奈何滄海濁沸日不敢浴金
波自爛玉免熟四方上下濁氛滿何許層冰映雕玉苦

熟何不可濁氛端惱我

大熱戲作

仕板三十年罪籍乃十歲妻兒歎朝夕欲免饑寒累爾
來官南陬長夏苦炎熾自疑吾其魚釜驚方盡沸金石
方流爍況此病而悴却顧妻兒笑聊取一嬉戲饑腸雖
自鳴寒凍非吾事

謝仲長通判朝議兄惠顧渚茶

天子不嘗陽羨茶二百餘年空咨嗟吾儂咨嗟苦未

休濤江春色遠含羞趙卿老矣刺史半緘題寄我甬水
頭故不敢西征逐貴嗜最宜東來同羈愁人生趣尚有
窮達草木還亦如人不誰家棄婦泪未乾忍對孤鴻暮
影寒趙卿蝦菜且良食莫教歸夢到長安

初秋思舊山

秋江未澄瀾秋聲已先到頗謝涼風吹客愁何須落葉
驚人老古來此興定何如自愁不愁自傾倒直爾相羊
好遠遊何不命駕歸嵩丘君乎不上三十六峰頂只恐

君家未是秋

送范八西上

江頭楓樹秋東吳王孫愁誰復憐北客夢不到中州去
去獨餘我何以解煩憂心事豈如期來歲同歸舟子今
未二十志氣長者流勤讀未勤問有待再見不

秋日江上作

秋色千里來潮波八月壯起帆增江勢勁風滋頽頽海
道當如何燕羽去雲上人生自窘束有情宜騁望兩眼

幸未盲莫謾讀易象

題明發所畫訪戴圖渠自有詩

扁舟雪夜興千載風流存詩畫能幽絕不似諸王孫興
多却易盡一世復何待傖父莫罵予猶且不見戴

嵐露雨

越山八月時颺漾嵐露雨却疑梅再黃奈何燕已去平
生始知名要來愁羈旅前愁豈不多紛紛新代故誰為
司愁者特於予不負寄言宦遊子行李莫忽遽

寓興

秋風來偏戰萬葉倏奔亡客子江海間是時多慨慷何
事新來鴈矯翼過吾鄉吾鄉多霜雪豈不坂路長思覽
萬物表試登千仞岡徜徉未終樂急景歎浮光

古人

古人愁已極今我不用愁去日已忽忽來日諒悠悠便
能如此志終恐慚白頭經月不讀書閉目得自求不如
懸車好更復狂言不

風雨縱橫至

風雨縱橫至此非淵明廬勉哉風雨操人品有賢愚彼
方適雲旗我切畏泥塗淒淒向深夜何處識斗樞

乘小艇戲作

知章騎馬似乘船我今乘船若騎馬舳鳴艫噴索莫馭
左磬右控手不把稍稍風恬可騁望忽忽波駭難遊冶
既信河流怒頰豪不疑瞿唐不可下婆兒未用傖兒恠
赤馬能戰馳馬敗傖兒自哂亦以屢愧爾會稽夏仲御馬

是晉船名馳
馬是吳船名

憶江南贈通叟年兄

北客而南征蹇產非所志問津人尚絕後來狂避世流
離竄斥者其數非一二風流稱南朝文物始佳麗要途
在荆揚僻左處吳會吳會興國來乃以丹漆貴若其大
才豪終是江南最君家住江南豫章生次第非但吾言
逼正爾百憂似易見巖下電難識斗間氣結綬三十
年挾策未一試譬如瑚與璣詎落日中市飄然渡浙江

式慰此憔悴我屋梁園久近卜嵩峯遼海蟲難下飭粟
漿有賤嗜不讀非聖書忍更增疣贅又不求甚解未肯
爭破碎排悶亦吟哦清潦誰滋味自從注罪籍一語不
敢謂豈惟要絕言自憎生此喙因君發吾狂明當保嚴
誓

桃

江南桃葉齊江北桃根低各自擅風流人情千載迷桃
花竟誰比風雨日淒淒

園中戲作白紵

人間春色不須更芳草
如華不縈紆楊花不分上空虛
宓妃一去百代無不如雲外
萬樂俱南斗鼓瑟北斗等
與酬酢者非君徒

題冲弟詩卷

阿冲五字來江山千里餘
能爾麗金碧定是勤詩書
文章與神明動作本自俱
古人既云已令公有規模
五世以文稱故家誰復如

昨日之日

昨日之日夢可追今日之日愁能遲日之授謝亦何有
但莫令吾忠信虧但莫令吾忠信虧家山北斗身海湄
膾鯨斲蛟既不得蝦虫腥鹹安用之難將短髮留長恨
山中好在雞黍期有船載書復歸去高誼解釋幽林思
贈然公界方

西方石為欄東山人可與不用量三江聊以壓四虎
偶見陳誠之一詩不勝欽歎輒紀贈求其巨篇

深愧蕪累

四明唐中葉處士有陳深書既殫萬象詩想瑤華音惜
哉不並傳裔孫自苦吟豈易識此孫海底珊瑚沉澌近
我見之昔恨阻冲襟念我理歸棹旅夢斷遙岑願乞十
九首降盡河外心

贈冲照

會稽城畔不見海會稽城裏海有聲此海之聲三尺桐
渺如渤澥含太清惜哉寂寥三十載月出愁空不肯明

邂逅彼孫曰冲照燕坐之餘秋色橫搖手照乎休可已
悲風河水客心驚我少學此今白髮念昔知音塚草生
亦復何人能子知空令此身不得輕遲鶴待此朝入饌
子食有禁寧無情

缺門遇王三兄師文

生民本羈旅何以娛今朝風雨峭澗道離別秋冬交忽
復有好懷故人道旁招如狂語錯亂疑夢情飄搖君髮
何盡白我志則全消憂患君恐可圖書興尚豪玷珪宜

委土良驥乃繫匏但願不再辱敢慕無久勞馬蹄分異
縣朔吹結同袍三年以為期嵩少理居巢

錢德載以臨江朱玠筆見贈以詩謝之德載與

李仙之亦相善

清江長官寄書來朱玠妙筆空悠哉恐是怕上萬言書
惡嫌並命憎不才

河中府古興寄劉杜輿

肘腋患難禦垣墻傾莫制遐哉論戰國破秦必在魏初

疑此語謾身到識真是河山既設險信食以自治秦雖
百虎狼得進不得退襄王昧遠圖蘓秦嗜近利惜哉計
畫疎為此山河愧我懷誰與語劉子長論議方為十二
史吾言不可廢眇聽常思君夢魂先朔吹

闕

至河之首訪鬼拔河圖有畫人云因陸學士移
其壁乃毀寸許令人感慨終日有作

坎坎分明拔河戲盛在北朝唐尚爾畫手何人鄭子虔
妙不戲人惟戲鬼更無獐獐可嚴怖既曰依人人是擬
家家賈勇負勝餘見之心寧不知耻最是隋宮窈窕春
汗粧蓬髮羞相比故宜落筆在蒲州門外河來三萬里
隣幾舍人有榻本詩翁賦詩名更起詠詩想畫二十年
客舍此邦心自喜攬真永絕偽物欺顧影豈盡形儀美
嗟予斷絕百事心癡處留情獨在此魑魅魍魎好奔迸
文彩風流終棄地出門訪之無處所惜哉史君陸子履

但欲便坐易瞻玩不知壁古難移徙豈無剝落一寸餘
我願寶之若瓊藥不然當學補亡詩收拾粉本細網紀
或謂前年九鼎成時無雜糅清如水雖有高室誰瞰之
亦莫擲揄毛手指帖壁不祥宜遁外彩門拋拔方靡靡
初至鄴州感事

罪斥云一紀常亦守官箴置身江海畔放言麋鹿岑大
吏不呵譴小吏自堪任蝦菜日異饌著書敵南金豈無
二三子善叩響不沈更逢四高士

果恂
立然

語妙何惜惜俯

攬塵土影仰攄永玉心苦辛雖在昔菑獲寔於今歸榜
不忍速故廬尚可尋金閨朝轡轄荃蘭夢蕭森領潤貽

爾誚新貴使我瘖饑寒一丈室

去年京師大雪

奔走九秋砧

今秋

數往來鄭蔡遂為西行

長坂馬難健敗絮虱易侵池西別故舊稅

駕雕山陰白翟無曩迹赫連有脫鐔幸哉廊廟術勇不

誇衆擒誓表前日來父子恩更深戰士老腐粟癯儒適

懦襟羊肥卧沙種酒美西涼斟農武自先烈五律勤窺

臨予專察視保甲今年初教五陣

禮樂被遠俗三嘆斥哇淫

予按外邑新樂

勉旃

不再辱卿爾容華簪斂迹有餘愧難聞弦誦音

予以名在邪籍

不得干與學士

尚喜屋山阿雙泉如鳴琴遠叫桑苧翁品茶疑

未諶洞中有仙者得度人駸駸長生非敢望却粒實所
欽腸空不貯愁慮絕發奇襟何勞東臯計即日返幽林
難忘平昔興一為梁甫吟

趨延安過野豬嶺

塹峭十月寒一步不得整如何騎鯨客來度野豬嶺遙
語謝康樂爾輩易清省

題楊如晦二畫

蜀道圖

山鉤樹白何年歲流瀑可聽下無地行人愁絕却無愁
始信宜歌蜀道易

邊鸞雉

駭雉丹青人姓邊無花無石自瞿然已能倚壁音聲絕
何用蹲飛欲上天

萱草

山中萱草三尺長
山中高人萬事忘
欲借忘憂汝輩力
世間兒女徒顛狂
汝亦忘憂非世憂
臨風恐汝亦分將
願爾忘憂忘終始
莫教老大空悲涼

鄜州張路鈐處見東坡所書漁父四首感歎之
餘因思諸王孫伯言善歌此辭每以為樂作
寄伯言視張

庾郎幾尺大腰圍
江北江南有好詩
今日王孫渾得似
仍知漁父醉醒時
為我高歌掩明鏡
上方涼簟鬼神悲

我曹早有江湖興風雨輕鷗細細隨君朝明光我園洛
愁腸只有酒為期海外騎鯨消息斷無窮飛絮解相思
孤舟本要載西子欲付此聲知有誰安西將軍元好事
紙筆題來十襲之

宿洛川嘉槐驛其槐真可愛因思李承之待制
嘗為此縣令有所建退省堂存焉

昔為扁舟客益覺此生浮逮今郵亭役重脰仍百憂嗟
予何所可歸去無田疇慚愧庭下槐百年霜霰秋上苑

誰移根兔目自山丘曾見李長官矯矯增風流欲登退
省堂秀句吟白頭天上問風月還似當年不

李白有詩云天上不

知風月好人間今夕
是中秋予每諷誦之

三川誦杜老觀水漲詩

平生少陵詩佳處豈盡識何敢窺意韻尚且昧形迹身
到三川來瞶瞶迷咫尺連天穹谷句忘饑三歎息高高
方若懸下下仍如績扶上而削下乃在吾行役突然念
此老鎔寫不可極意中無遺境界外有餘力後來羣偷

兒蠹魚婆口食安知九鼎珍宜爾終身瘠此行敢告勞

顧影若有得不見水漲時兩眼猶歷歷

古人論是非不公曰興則扶上

哀則削下

三川言十數年前嘗有一短情騎驢之士半醉

徘徊原上久之曰三川非昔時比矣恍惚失

其人所在有收杜老醉遊圖者物色之知為

杜之再來也予獨鄙之作詩二首

君不見少陵有客字子美三賦獻罷胡塵起招魂收淚

謁行在寧論家室三川裏雲寒日淡劍閣深翠華望斷
塵埃底狼虎食人大道傍回首妻孥須怖此亦嘗寄書
問訊之鯉魚何在滄溟徙晚年雖卜浣花居心折秦雲
恨有餘茯苓不御丹砂就仙去還來縱目初乾坤宿醉
參橫醒且策東家舊蹇驢隣里一人安可得亦無墳冢
可羨無人間偈仄何偈仄却自騎驢追李白

其二

君不見杜老死去傲九天肯顧腐臭下山川問予何事

知其然此世此老無姻緣平生志願得酒眠暫時去作
酒中仙況今仙侶瓊琚連瑤池醉倒阿母前一瞬人間
億萬年泰山為塵海作田何處更復有山川鳳凰五色
歌雲烟三川何人若浪傳汝曹虱腦真可憐華清有夢
亦狂顛夜闌秉燭仍悵悵君不見狄卽志尚冰玉堅獨
聞此老近作佳城篇

景迂生集卷四